

Suomâ evangellâš-luterilii kirho

# kielâstrategia

**SÁRNUM IMELÂN JÁ  
IMELIST JIEIJÂS KIELÂN**

## ÁÁRVUH

Olášuttep kielástrategiast kirho áárvuid:

- Pase kunnijättem
- Ovdásvástádásvuotâ
- Vuoigâlášvuotâ
- Tuotâvuotâ.

Kuáhtáp jyehi ulmuu máhđulášvuodâi mielđ suu eenikielân. Toollâp kirho toomâ ávusin jieškote-uv kielâ- já kulttuurjuávhoid.

## MERHÁŠITTEE KIELÂLIH VUOIGÂDVUODAH

- Kirkkolaavâ 4 lovo 4 § mielđ: Immeelpalvulusâid já eres toomâ kalgeh táárbu mielđ ornid sehe suomâ-teikâ ruotâkielâlii ete eres ucceeblovo kielân.  
Kirho jesânist lii vuoigâdvuotâ finnid sunjin kyeskee priivaat kirholijd toimâttásâid eenikielân, suomâkielân teikâ ruotâkielân. Immeelpalvulusâst já kirholâš toimâttásâst pyehtih kevtiid meid eres kielâ.  
Sämikuávlust servikode toomâ kalgeh ornid já servikode jesânjid palvâlid meid sämikielân.
- Vuádulaavâ 17 §:st já kielâlaavâst torvejuh juáhháá vuoigâdvuodâ kevtiid virgeomâhâin jieijâš ääšist jieijâš kielâ, jo-uv suomâ- teikâ ruotâkielâ, sehe finnid toimâttâskirje taan kielân. Sämiikielâlij vuoigâdvuodâin asâtteh säämi kielâlaavâst.

## ULMEH

- Turvip vuoigâdvuodâ kuáhtâđ Pase já šoddâđ palvâluđ jieijâš eenikielân.
- Tubdâp aalmuglâškielâid suomâkielâ já ruotâkielâ vyeimiväärrin já ovdedep tai kevttim kirhostân.
- Huolâttep kielâlâš täsiáárvu olášuumeest kirho haldâttuvvâst já visâsmittep máhđulášvuodâ ášástállâđ kirhoost jieijâš eenikielân, suomâ- teikâ ruotâkielân.
- Turvip sämiikielâ kevttimáhđulášvuodâ sämikuávlust já ovdedep sämiikielâlâš vuoigâlâš toomâ meid eres kuávlust Suomâst.
- Tuárjup seevim- já romanikielâlij uásálistem servikode-elimân.
- Lep oovdâstjottee maangâkulttuurlâš toimâpirrâs vuotânvâldimist. Iberdep táárbu kevtiid jieijâš eenikielâ já kuáhtâđ ulmuid jieijâš etnisâš tuávvâást. Nanodep ristâlij ohtâvuodâ kielâ- já kulttuurraajij rasta.
- Ovdedep oovtâstpargo já toimâvuovijd, moi vievâst kielâlij vuoigâdvuodâi olášuumeest pyehtip huolâttid tááláá já meid uccoo resurssijguin.
- Vâldip sierâ kielâjuávhui táárbuid vuotân puoh viestâdmist.
- Nanodep kirho pargei kiärgusvuodâid kuáhtâđ ereskielâlijđ ulmuid.

# T

## TOIMÂIÄVTUTTÂSAH

### SERVIKUUDIJN

- Râhtip lattimravvuid tai tiilij várás, main servikode palvulusâid pivdeh eres ko servikode váldukielân. Anneep ävkkín pispekode toollâm luvâttállâm paapâin, kiäh tuálih toimâttásâid eres kielân.
- Adelep máhđulášvuodâi mielđ tiilijđ eres kielâid já kulttuurijđ ovdâsteijee siärvâduvâi kiävtun.
- Ornip tilâlášvuodâid já uásálistep tábâhtussâid, main lääččih ohtâvuodâid eres kielâ- já kulttuurjuávhui kooskân. Tágaréh pyehtih leđe ovdâmerkân immeelpalvulusah, maid toimâtteh servikode ucceeblovo eenikielân sehe ereskielâliih rippâškoovlah já muččâdumoseh juovlâlavluuh-tilâlášvuodah.
- Vâldip rekrytistmist vuotân sehe servikode palvulusâi faallâm kuohtuid aalmuglâškielâid ete ohtsâškode maangâkulttuurlâšvuodâ asâtteh uđđâ hástusijđ.
- Vâldip vuotân kielâuáinuid pargo vátávâšvuodâ miäruštálmist, mii lii päälhi vuáđđusin.
- Movtjidittep pargeid kielâškovliimân.
- Ovdedep oovtâstpargo suomâ- já ruotâkielâlij servikuudij kooskâst.
- Anneep ävkkín servikodepargoost kielâtáidusijđ rijjâtâtulijđ.

### PISPEKUUDIJN

- Nomâttep ohtâvuodâulmuu, kiän pargon lii tuárjuđ servikuudijđ kielâlij vuoigâdvuodâi olášutmist.
- Paijeentoolâp luvâttállâm, kost láá tiäduh paapâin, kiäh pispekode kuávlust taheh toimâttásâid sierâ kielâid.
- Kiedâvuššâp kielâstrategia olášuttem pispekode kirkkohiärái čuákkimijn já eres pargeeteivâdmijn.
- Čuávvup kielâstrategia já kielâlij vuoigâdvuodâi olášume pispekode kuávlust el. pispetârhistmij ohtâvuodâst.

### KIRKKOHALDÂTTUVVÂST

- Huolâttep kelijdeijee kielâlijđ vuoigâdvuodâid já tai olášumân kyeskee ravviimist tuámukapittálláid, servikodeovtâstumijđ já servikuddijđ.
- Râhtip amnâstuv servikuudijđ kiävtun suomâkielân, ruotâkielân, tavesâmi- já anarâškielân sehe máhđulášvuodâi mielđ eres kielâid.
- Nanodep škovlimfalâlduv, mast váldojeh vuotân kielâliih táárbuh já kulttuurijđ sierânâsjiešvievih.
- Anneep ävkkín sosiaallâš media já eres viestâdemteknologia nuuvt maangâid kielâid ko máhđulâš.